



INATSISARTUT

Aningaasaqarnermut Aatsitassanullu Naalakkersuisoq

Ulloq: 8. april 2016
J.nr.: 01.31.06/16-00711

Aningaasaqarnermut Akileraartarnermullu Ataatsimiititaliap pingasunngornermi ulloq 6. april 2016-imi aalajangiineranik Naalakkersuisunut ilisimatitsineq.

Illuut A/S – ingerlatseqatigiiffiup siulersuisuisa aqutsisuisalu allanngorneri pillugit ingerlatseqatigiiffiup ileqqoreqqusaasa allanngutaat – Suliaq nr. 01.31.06/16-00711.

” Naalakkersuisut inassutigaat,

- siulersuisut Ineqarnermut, Sanaartornermut Attaveqatigiinnermullu Naalakkersuisoqarfimmi pisortaanermit kiisalu ineqarnermut sanaartornermullu immikkoortortaqarfimmi pisortanit inuttalerneqartalersillugit ingerlatseqatigiiffimmi ileqqoreqqusat allanngortinneqassasut,
- siulersuisuni pikkorissunik piginnaaneqarluartunillu aammalu akissarsiaqartinneqartunik aqutsisoqaleqqullugu ingerlatseqatigiiffimmut ileqqoreqqusat allanngortinneqassasut
- Illuut A/S-ip aamma INI A/S-ip siunissami Namminersorlutik Oqartussat inis-siaataannik attartortittakkanik allaffissornikkut aqutsinermit atorneqarnissaat pillugu Ineqarnermut, Sanaartornermut Attaveqarnermullu Naalakkersuisoq aasannginnerani Naalakkersuisut isummernissaannut tunngavissiamik saqqummiussissasoq.”

Aningaasaqarnermut Akileraartarnermullu Ataatsimiititaliap oqaaseqaatai apeqqu- taalu:

Suliaq matumani pineqartoq ilisimatitsissutitut suliamut, Naalakkersuisut ataatsimiititalia-mut ukioq manna siusinnerusukkut nassiussaannut, malitseqartitsissutaavoq. Ilisimatitsissut taanna pillugu Naalakkersuisut Siulittaasuat ukioq manna ulloq 3. februar siunersiorne-qarnissamut ataatsimiititaliamit aggersarneqarpoq.

Taamani ataatsimiititaliaq aallaavittut isigalugu isumaqarpoq Namminersorlutik Oqartussat ingerlatseqatigiiffiiniq aqutsinermi pingaarnertut akisussaaffimmik tamakkiisumik Nammi-nersorlutik Oqartussani sulisut nakkutilliusussanngortinneqartarnerat ulluinnarni aqutsiner-mut naalakkersuinikkut akuliuttannginnissamut naapertuutinngilluinnartoq. Tassunga atatil-lugu ersarissunik najoqqutassaqaarnissaq ataatsimiititaliamit aamma pingaartinneqarpoq, taamaalilluni Namminersorlutik Oqartussat naalakkersuisoqarfiini sulisut ingerlatseqati-giiffiit immikkuutaartumik ingerlanneqarnerannut peqataatinneqannginnissaat imaluunniit Namminersorlutik Oqartussat ingerlatseqatigiiffiini sulianut ataasiakkaanut akulerutinngin-nissaat qulakkeerniarlugu. Tamatumani Namminersorlutik Oqartussat ingerlatseqatigiiffiini pisortanik sulisunilluunniit allanik atorfinitsitsisarneq soorunami aamma eqqarsaati-gineqarpoq.

Suliami matumani suliffeqarfik immikkoortortarisaq pineqanngimmat ingerlatseqatigiiffilli attartortitsisarnermik annertuumik ingerlataqartoq aammalu aningaasanik amerlasooru-jussuarnik aqutaqartoq pineqarmat ataatsimiititaliap Naalakkersuisunut aamma eqqaasitsis-

sutigaa. Taamaattumillu suliaq matumani pineqartoq naapertorlugu allannguisoqassappat siulersuisut pisortatullu atorfiup pikkorissunit piginnaaneqarluartunillu aammalu aktiaateqarluni ingerlatseqatigiiffiit pillugit inatsimmi anguniarneqartunut siunertarineqartunullu naapertuuttumik inuttalerneqarnissaat ataatsimiititaliamit kissaatigineqarpoq.

Suliamik ingerlatsinermi kukkusoqarsimanera pissutigalugu suliaq unitsikkallarneqarsimasoq Naalakkersuisut siulittaasuata ulloq 3. februar siunersuineri paasissutissiissutigaa. Siusinnerusukkut 16. december 2009-mi aalajangiisimaneq, ataatsimiititaliap suliaa nr. 01.31.06/09-00448, pissutigalugu taamatut aalajangiinissaq Aningaasaqarnermut Akileraartarnermullu Ataatsimiititaliamit akuerineqartariaqarpoq. Aalajangiinini pillugu ulloq 17. december 2009-mi ataatsimiititaliap allakkiaani ilaatigut makku allassimapput:

”Kiisalu ingerlatseqatigiiffimmut malittarisassani § 5.1, 6.1 aamma 9.3 naapertorlugit ingerlatseqatigiiffiup siulersuisui qullersaalu akissarsiaqartinneqannginnissaat ataatsimiititaliamit maluginiarneqarpoq – aalajangiisuutinneqarlunilu.

Ingerlatseqatigiiffiup malittarisassai taakku kingusinnerusukkut ataatsimeersuarnermi allanngortinneqarsinnaasut ataatsimiititaliamit ilisimaneqarpoq. Aningaasaqarnermullu Ataatsimiititaliap matumani akuersineranut tunngavissaatinneqarpoq aalajangersakkat siuliani taaneqartut malittarisassatut pituttuisutut katersorneqarnissaannik Naalakkersuisut UPA 10-mi qinnuteqarnissaat sioqqullugu malittarisassani siuliani taaneqartuni aalajangersakkanik allanngortitsineq aatsaat pissasoq Aningaasaqarnermut Ataatsimiititaliap siumoortumik akuersineratigut, tak. matuma kinguliani allassimasut.”

Ilaatigut piunasaqaatit tunngavissallu siuliani allassimasut tunngavigalugit suliami siuliani taaneqartumi Naalakkersuisut inassuteqaataat Aningaasaqarnermut Ataatsimiititaliamit ulloq 16. december 2009-mi akuerineqarput.

Naalakkersuisut matumani inassuteqaataat ingerlatseqatigiiffinnut Namminersorlutik Oqartussanit pigineqartunut tunngatillugu ulluinnarni aqutsinermut naalakkersuinikkut akuliuttannginnissaq pillugu apeqqummut ataatsimiititaliap apeqqusiineranik allanngortitsinngimmat ataatsimiititaliamit Naalakkersuisunut nalunaarutigineqassaaq.


Illuut A/S-ip aamma INI A/S-ip siunissami Namminersorlutik Oqartussat inissiaataannik attartortittakkanik allaffissornikkut aqutsinermut atorneqarnissaat pillugu Ineqarnermut, Sanaartornermut Attaveqarnermullu Naalakkersuisoq aasannginnerani Naalakkersuisut isummernissaannut tunngavissamik saqqummiussinissaa ataatsimiititaliamit akuerineqassasoq Naalakkersuisut kingullertut inassutigaat. Najoqqutassat naapertorlugit taanna Aningaasaqarnermut Ataatsimiititaliamut ilisimatitsissutaannartut isigineqartariaqarpoq, tassa Naalakkersuisut susasaqarfianut tunngammat, taamaattumillu ataatsimiititaliamit akuerineqarnissaa pisariaqarani. Isummernissamulli tunngavissiap assilineqarneranik pissarsisinneqarnissani ataatsimiititaliap qilanaaraa. Tassunga atatillugu ataatsimiititaliamit tupigusuutigineqarpoq isummernissamut tunngavissiap Naalakkersuisumut suliassaqarfimmut akisussaasuusumut aasartinnagu suliareqquneqartup naammassinissaanut sooq suliaq utaqqinneqarsinnaannginnersoq.

Kiisalu inatsiliornermik suliat marluk ingerlanneqartut kiffiat paasissutissiissutigineqassasoq ataatsimiititaliamit kissaatigineqarpoq. Siulleq tassaavoq Illuut A/S pillugu inatsisissaq, Naalakkersuisut ulloq 9. februar 2010-mi allakkaminni suli suliarineqartutut ataatsimiititaliamut nalunaarutigisaat. Aappaa tassaavoq ineqarnermi illuuteqarnermilu pisortat allaffeqarfiinut Inatsisartut inatsisissaattut siunnersuut, Naalakkersuisut ulloq 22. marts 2010-mi allakkaminni suli suliarineqartutut ataatsimiititaliamut nalunaarutigisaat.

Aningaasaqarnermut Akileraartarnermullu ataatsimiititaliap aalajangiinera

Siuliani allassimasutut oqaaseqaateqarluni Aningaasaqarnermut Akileraartarnermullu Ataatsimiititaliap Naalakkersuisut inassuteqaataat **akuerisinnaangilai.**

Ataatsimiititaliaq sinnerlugu



Jens Immanuelson

Aningaasaqarnermut Akileraartarnermullu Ataatsimiititaliap Siulittaasua